


# surat popular

## la' o hamutuk



instituto ba analiza no monitor rekonstrusaun timor loro sa'e

## **Kiak no Riku iha Mundu**

Ita hotu nudar ema,  
moris iha mundu ida deit.  
Iha mundu ne'e,  
ema moris ho kultura ida-idak,  
kor la hanesan no relijiaun oi-oin.  
Maibe ita nia moris  
sei depende ba malu nafatin.  
Neduni ita persiza  
moris hamutuk,  
atu nune ita bele hakiak ita nia  
domin iha mundu ida ne'e.  
Ema hotu bele hetan buat nebe  
sira persiza se ita fahe ba malu didia



Agora ema balu iha buat barak  
maibe ema seluk iha uituan deit.  
Ema balu iha kbiit boot maibe ema seluk ladun iha kbiit.  
Mos, rai balu iha kbiit no rikeza boot maibe  
rai seluk iha uituan deit.  
Situasaun ne'e mak hamosu konflikтус barak iha rai-klaran agora.

Favor haree didiak desenho iha pagina ne'e.  
Desenho ida ne'e hatudu saida ba ita boot?  
Desenho ida ne'e fo mensajen saida ba ita hotu?

# Saida mak Primeiru Mundu no Terseiru Mundu?


Ohin loron ne'e, ema barak mak uza liafuan "primeiru mundu" no "terseiru mundu".

Primeiru mundu hateten katak nasaun sira nebe riku no iha industria bo'ot iha sira nia nasaun.

Nasaun sira nebe tama iha grupu primeiru mundu mak hanesan Europa no Amerika Norte, Japaun, Australia, no Nova Zealandia. (Uluk ema mos uza liafuan segundu mundu ba nasaun sira nebe tuir Russia, maibe agora ema ladun uza liafuan ne'e.)

Terseiru mundu hateten katak nasaun sira nebe kiak no ladun iha industria.

Nasaun sira nebe tama iha grupu terseiru mundu mak hanesan nasaun sira iha Asia (hanesan Xina, India, Afghanistan, Indonesia) no mos nasaun hotu iha Afrika, Amerika Latin no Karibeana. Nasaun nebe ema klasifika iha nasaun terseiru mundu mos ema hanaran "nasaun hadia an dadaun" ka "negara berkembang".



Agora, ema maiyoria (besik 75%) iha mundu hela iha terseiru mundu. Maibe ema sira ne'e hetan deit asesu ka kontrola rikeza mundu nian menus hosi 15%.

Ema nebe hela iha primeiru mundu 20% hosi populasaun mundu nian, maibe sira mak kontrola merkadu, investimentu, industria no eksplorasaun kuaze 75% iha mundu tomak.

Desigualidade global no diferensia boot entre ema riku no ema kiak ne'e mosu mos iha nasaun ida-idak nia laran.

# Historia Desigualdade Global

Qhin loron, iha mundu ne'e, iha diferencia boot entre ema riku no ema kiak. Ema riku iha mundu ladun barak maibe sira sai riku ba beibeik. Ema kiak barak liu iha mundu, maibe sira sai kiak ba beibeik. Diferencia ida ne'e bele amiasa no estraga ita nia futuru.

Iha ema balu hateten katak ema kiak tamba sira la servisu maka'as no ema sai riku tamba ema sira ne'e servisu maka'as.

Maibe, se ita haree historia kona ba moris sai riku no kiak iha nasaun sira primeiru mundu nian, ita bele haree no bele hateten katak sira sae riku tamba halo eksplorasaun ba ema seluk.



## Kolonialismu

Husi tinan 1400, ema Europa hahu halo viajem buka riku iha rai se-seluk. Portugal, Belanda, Inglaterra, Espanha no nasaun seluk tan mai buka bazaar no profitu.

Sira hakarak osan mean, xa, temperus, café, no masin midar ne'be sira la bele hetan iha Eropa.

Ikus mai, nasaun hirak ne'e harii merkadoria no ukun nasaun sira seluk.


Espanha no Portugal ba iha Amerika lori kuda no kilat, depois oho ema barak iha neba. Konquistadores sira ne'e foti ema nia riku soin hanesan osan mean no mutin husi rai nebe sira tama, ne'e hotu sira okupa rai nebe diak ka bokur, nune mos sira obriga ema rai nain sira atu sai atan ba sira, mos lori ema hosi rai seluk hanesan Afrika atu servisu nudar atan ba sira iha to'os.

Profitu nebe hetan hosi kolonialismu ne'e ajuda sira hodi harii fatoria no makina ba industrializasaun iha Eropa.

Eksplorasaun rekursu meu ambiente no mos ema ajuda harii diferencia entre mundu primeiru no mundu terseiru.

# Kiak no Riku iha Timor Lorosa'e

Timor Lorosa'e hanesan nasaun ida nebe foin sai hosi kolonialismu nia liman, mos klasifika iha grupu nasaun kiak ka terseiru mundu. Durante tempu kolonialismu, Timor terus no lakon rikeza barak.



Ema balu dehan katak tempu kolonialismu hotu ona. Maibe ema balu sei hateten katak agora iha neokolonialismu ka kolonialismu ho oin foun.

Sira dehan katak instituisaun internasional mak halo kolonialismu foun.  
**Tuir ita boot nia hanoin, tempu kolonialismu hotu ona ka la'e?**

Iha Indonesia nia tempu, nasaun riku hirak mak fo apoiu ba Indonesia nia okupasaun. Agora, nasaun sira ne'e mak fo asistencia ba desenvolvimentu Timor.  
**Tuir ita nia hanoin, sira fo apoiu ba Indonesia uluk tamba sa?**  
**No sira fo apoiu ba Timor agora tamba sa?**

Ema balu comprende liafuan kiak no riku tuir definisaun nebe fo valor deit ba osan. Por ejemplu, tuir Banku Mundial nia definisaun ema nebe kiak mak ema nebe hetan osan US\$1 deit ka menos iha loron ida nia laran. Ema barak seluk dehan katak liafuan kiak hatete katak ema nebe laiha oportunidade atu hetan edukasaun, servisu no saude diak.  
**Tuir ita nia hanoin, liafuan kiak katak saida?**  
**Tuir ita nia hanoin, saida mak rikeza?**

Uluk, ita haree katak iha Indonesia iha distansia boot entre ema kiak no ema riku. Ita haree katak ema lubun ida-sira nebe besik Suharto-mak sai riku maibe ema barak liu mak sai kiak, kiak ba beibeik.  
**Oinsa povo Timor Lorosa'e bele hetan igualidade iha nasaun nia laran no mos iha mundu nia laran?**